

DNM ta informa ariba leyman cu ta prohibi core y haci daño na nos beachnan y especienan protegi

DEN preparacion pa Semana Santa Directie Natuur en Milieu (DNM) y conhuntamente cu Korps Politie Aruba seccion San Nicolas ta informa publico en general tocante leyman cu ta prohibi coremento cu vehiculonan, laga sushi atras y haci daño na nos flora y fauna como tambe nos beachnan.

E meta principal ta pa informa e personanan cu ta bay busca un vergunning pa campa y e manehando di vehiculo tocante reglanan di e uzo di nos beachnan. Esaki especificamente tin di haber cu hendenan cu ta campa y core ariba santo blanco y asina destruyendo nos recursonan natural y e organismonan cu ta biba y haci uzo di nos costanan.

Hopi biaha sa sosode cu durante y despues di e temporada di campamento, sushedad ta keda atras entre otro palet, carbon, materialnan di plastic, resto di cuminda y tapadera di bebida. Esakinan ta prohibi pa ley.

DNM y POLIS ta informa ariba e siguiente leyman: Decreto Nacional Playanan y Costanan Publico (Landsbesluit openbare wateren en stranden) art. 25 y art. 30. Artículo 25 especificamente ta prohibi pa core of pasa riba nos costanan cu vehiculonan di motor, baisnan y of bestianan (rij-of trekdieren manera cabay). Artículo 30 ta especifica cu ta prohibi pa tira/benta/deshaci/laga atras materialnan cu ta clasifica como sushedad e.o di boternan, verpakkingsmaterial y of otro materialnan den lama of riba costanan.

Conforme articulo 16 di Algemene Politie Verordening (APV) ta prohibi pa contamina nos costanan, beach y tambe nos lama. E mesun APV ta reglamenta cu ningun sushedad den ningun forma sea liquido of solido riba nos beach, costa y lama.

Conforme e Landsbesluit bescherming inheemse flora en fauna ta prohibi pa mata, haci daño of molestia entre otro turtuganan di lama, rogans, mangrovenan, banana di rif, calconan, strea di lama, bushi di lama y tambe diferente sorto di cadushinan.

DNM y KPA ta haci un yamada na publico en general, tur esnan cu ta campa y usarionan di beach y lama pa tene cuenta cu nos leyman y respeta nos recursonan natural.



Den un recorrido un siman pasa DNM y Polis a tuma nota cu ta core cu auto riba nos beachnan. Tambe a tuma nota di matanan cu ta corta. Y tambe e fenomeno di Rock Stacking. Nos ta descurasha esaki pasobra e ta destrui luganan di proteccion di organismonan pero tambe ta contribui na 'Horizon Polucion'. Ban STOP hendenan di haci esaki, muestra bo amor pa naturalesa door di respeta esaki.

Cu e informacion aki publica, DNM y KPA ta considera cu tur usuario ta bon na altura di nos leyman. Asina nos ta conta cu un y tur lo yuda mantene Aruba limpi y nos costanan liber di trafico pa NO stroba naturalesa y e organismonan cu ta biba eyan.